

Bil. 51

Rabu

13 November 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Penyakit Jarang Jumpa**
- YB. Tuan Sivakumar Varatharaju Naidu (*Batu Gajah*) [Halaman 1]
- **Utamakan Produk Pertanian Domestik**
- YB. Datuk Seri Ir. Dr. Wee Ka Siong (*Ayer Hitam*) [Halaman 3]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA**

Rabu, 13 November 2019

Mesyuarat dimulakan pada pukul 2.30 petang

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Penyakit Jarang Jumpa

2.34 ptg.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua. Terima kasih juga diucapkan kepada Timbalan Menteri Kesihatan yang sudi datang memberi jawapan kepada soalan saya berkaitan dengan penyakit jarang jumpa.

Tuan Yang di-Pertua, saya ingin merakamkan setinggi-tinggi penghargaan kepada Kementerian Kesihatan Malaysia di atas penubuhan Jawatankuasa Penyakit Jarang Jumpa Kebangsaan pada 10 Julai 2019. Jawatankuasa ini mampu bertindak sebagai ejen penggerak untuk mengetengahkan isu-isu dan cabaran-cabaran yang dihadapi oleh pesakit jarang jumpa khususnya kanak-kanak. Bilakah Kementerian Kesihatan Malaysia merancang untuk menyediakan *registry* negara yang sudah lama tertangguh untuk penyakit jarang jumpa supaya kita dapat mengetahui keadaan semasa pada zaman moden ini.

Terdapat banyak kekangan untuk penyakit jarang jumpa seperti kekurangan peruntukan, kekurangan akses perubatan, ketiadaan pakar-pakar dan terapi untuk penyakit jarang jumpa walaupun ada perkembangan dan kesedaran tentang hal ini di Malaysia. Oleh itu, apakah pelan jangka pendek dan jangka panjang KKM untuk menangani masalah-masalah ini dan cabaran-cabaran lain yang berkaitan. Adakah Polisi Penyakit Jarang Jumpa Kebangsaan yang diperkenalkan baru-baru ini boleh menjadi salah satu medium untuk mengatasi cabaran-cabaran yang disebutkan. Terima kasih.

2.36 ptg.

Timbalan Menteri Kesihatan [Dr. Lee Boon Chye]: Terima kasih Tuan Yang di-Pertua dan terima kasih kepada Yang Berhormat Batu Gajah.

Kementerian Kesihatan Malaysia sentiasa memberi perhatian dan amat prihatin dalam memastikan setiap pesakit penyakit jarang jumpa ini mendapat rawatan yang sempurna demi mengurangkan beban keluarga pesakit. Lanjutan itu, Kementerian Kesihatan Malaysia telah membangunkan *National Framework for Rare Disease*, dengan izin bagi mewujudkan satu Jawatankuasa Tadbir Urus untuk mengintegrasikan pengurusan pesakit penyakit jarang jumpa di Malaysia. Ianya adalah satu usaha secara komprehensif dan holistik yang turut merangkumi advokasi pendidikan kesihatan kepada orang awam, saringan dan diagnosis pesakit.

Di samping itu, ia akan turut memantapkan diagnosis sebelum kelahiran dan pemeriksaan bayi baru lahir, pengurusan klinikal, sistem rujukan, pengumpulan data serta penyelidikan berkaitan penyakit jarang jumpa. Di dalam Jawatankuasa Tadbir Urus ini, ia turut dianggotai oleh pelbagai pemegang taruh yang berkaitan dengan pengurusan pesakit penyakit jarang jumpa di Malaysia seperti Kementerian Pembangunan Wanita, Keluarga dan Masyarakat, Jabatan Kebajikan Malaysia, Kementerian Pendidikan dan sebagainya.

Dari segi pelan jangka pendek di bawah rangka kerja ini, ia adalah untuk menentukan definisi penyakit jarang jumpa di Malaysia. Selain itu rangka kerja ini turut membantu mengukuhkan tadbir urus perkhidmatan penyakit jarang jumpa dengan mengukuhkan makmal, merangka dasar dan strategi berkaitan perolehan dan ketercapaian ubat-ubatan *orphan* dan produk *orphan* di Malaysia di mana kita mungkin beri *pathway*, akses yang lebih cepat untuk produk *orphan*. Dalam pada itu juga, pelan jangka pendek rangka kerja ini akan dapat memantapkan advokasi dan pendidikan kesihatan berkaitan penyakit jarang jumpa.

Bagi pelan jangka panjang pula, KKM berhasrat untuk mewujudkan satu pangkalan daftar berkaitan penyakit jarang jumpa bagi mengumpul dan menganalisa data untuk tujuan pembangunan dan pemantauan kesihatan pesakit dalam menilai program pengurusan klinikal yang dijalankan. Kementerian Kesihatan Malaysia juga turut menggalakkan penyelidikan dan pembangunan di dalam bidang berkaitan penyakit jarang jumpa serta bekerjasama dengan syarikat insurans untuk melindungi pesakit dengan penyakit jarang jumpa. Sekian, terima kasih.

Utamakan Produk Pertanian Domestik

2.39 ptg.

Datuk Seri Ir. Dr. Wee Ka Siong [Ayer Hitam]: Terima kasih Tuan Yang di-Pertua. Menurut perangkaan Lembaga Pemasaran Pertanian Persekutuan (FAMA), nilai import buah-buahan dan sayur-sayuran pada tahun 2018 ialah sebanyak RM8.5 bilion dan kita terlalu bergantung kepada China, Thailand, Australia, India dan Afrika. Statistik yang dikeluarkan oleh Jabatan Pertanian pula mengatakan pada tahun 2018, sebanyak 585 ribu tan metrik buah diimport manakala sayur-sayuran pula sebanyak 1.49 juta tan metrik. Sementara statistik bagi suku ketiga tahun 2018 menunjukkan, sektor agromakanan hanya menyumbang sebanyak 3.4 peratus kepada keluaran dalam negara kasar (KDNK).

■1440

Saya berpendapat bahawa penanaman sayur-sayuran dan buah-buahan tempatan berpotensi menyumbang pulangan yang lebih besar bukan sahaja kepada negara tetapi juga pekebun kecil. Justeru itu, saya mendesak kerajaan supaya:

- (i) Menyegerakan 18 strategi dan 51 inisiatif yang terkandung di dalam hala tuju kementerian, khususnya dalam pengeluaran sayur-sayuran dan buah-buahan tempatan.
- (ii) Dalam masa sama, pihak kementerian perlulah sentiasa turun ke lapangan dan mendengar sendiri pandangan atau suara pekebun kecil sebelum membuat sebarang keputusan atau polisi kerajaan. Pandangan mereka lebih tulus dan ikhlas demi manfaat bersama khususnya dalam pembangunan ekonomi luar bandar.
- (iii) Selain itu, penduduk di kawasan Yong Peng sering mengadu mengenai ketiadaan lokasi strategik untuk berniaga atau memasarkan hasil pertanian mereka. Diharapkan sebuah pusat pengumpulan dan pengagihan hasil pertanian dapat didirikan bagi memenuhi hasrat dan keperluan warga Yong Peng ini.

Sedia maklum, Ayer Hitam dan Yong Peng terkenal dengan pengeluaran buah-buahan seperti tembikai, limau besar (*pomelo*) serta sayur-sayurannya. Malah, kawasan ini merupakan pengeluar sayur-sayuran tempatan terbesar selepas Cameron Highlands. Justeru itu, pihak kementerian digesa memberikan tumpuan yang serius di kawasan ini bagi mencapai hasrat negara untuk mengutamakan produk Malaysia bukan sahaja untuk pasaran tempatan tetapi juga menembusi pasaran antarabangsa. Sekian, terima kasih.

2.41 ptg.

Timbalan Menteri Pertanian dan Industri Asas Tani [Tuan Sim Tze Tzin]: Terima kasih Tuan Yang di-Pertua dan terima kasih Yang Berhormat Ayer Hitam.

Sebagai sebuah negara ekonomi terbuka, perdagangan bahan pertanian dan bahan makanan akan terus memainkan peranan penting bagi pertumbuhan ekonomi negara. Sememangnya diakui bahawa negara banyak mengimport bahan makanan iaitu 70 peratus bagi sayur-sayuran dan 35 peratus daripada buah-buahan. Namun, 78 peratus daripada sayur-sayuran yang diimport tadi dan juga 64 peratus daripada buah-buahan yang diimport tadi adalah sayur-sayuran dan buah-buahan iklim sederhana (*tempered food*). Jadi, yang tidak sesuai ditanam di Malaysia seperti bawang, kentang, lobak merah, epal, limau Mandarin dan anggur.

Pada tahun 2018, nilai import sektor agromakanan telah berkurang sedikit kepada RM5.1 bilion berbanding dengan RM51.3 bilion pada tahun 2017 iaitu pengurangan sebanyak 2.3 peratus KDNK. KDNK suku kedua 2019, sektor agromakanan turut menunjukkan sedikit peningkatan iaitu 3.5 peratus berbanding 3.4 peratus pada suku tahun ketiga 2018.

Untuk makluman Yang Berhormat, kesemua 18 strategi dan 51 inisiatif yang dinyatakan dalam Dokumen Hala Tuju Kementerian Pertanian dan Industri Asas Tani, Prioriti dan Strategi 2019 hingga 2020 sedang giat dilaksanakan oleh kementerian.

Mengenai pengeluaran sayur-sayuran dan buah-buahan tempatan yang diletakkan di bawah Hala Tuju 3, Strategi 1, Inisiatif 3, menjana pendapatan melalui Projek Pertanian Rakyat (PPR). Status pencapaian adalah seperti berikut:

- (i) Sasaran suku kedua dari segi buah-buahan adalah RM1.13 bilion. Pencapaian adalah RM1.15 bilion melebihi pencapaian sebanyak 2 peratus iaitu 102 peratus;
- (ii) Sayur-sayuran, *target* adalah RM984.2 juta, pencapaian pula adalah RM886.9 juta iaitu 90 peratus.

Sebagai kementerian yang berperanan untuk menjaga kebajikan petani, warga kementerian sentiasa turun ke lapangan bagi mendengar suara petani yang mengusahakan projek pertanian skala kecil. Sebagai contoh, di bawah Jabatan Pertanian, pegawai pertanian daerah, agen pengembangan tanaman dan ejen pengembangan industri asas tani melaksanakan lawatan terhadap petani secara berjadual. Seramai 207,555 orang petani telah dilawati sepanjang tahun 2018 menerusi perkhidmatan dan pengembangan pertanian.

Manakala sehingga Jun 2019, seramai 97,361 orang petani atau projek telah dilawati menerusi program yang sama. Selain itu, pihak kementerian sendiri termasuklah Menteri, Timbalan Menteri dan pengurusan atasan juga sering mengadakan program turun padang dan

sesi dialog bersama petani bagi memahami isu dan masalah yang dihadapi serta mendapatkan pandangan mereka terhadap program dan perancangan kementerian. Di kawasan Yang Berhormat saya sudah turun dua kali, Yang Berhormat tahu kan, di kawasan Yang Berhormat sendiri.

Daerah Yong Peng sememangnya terkenal sebagai pusat pengumpulan buah-buahan di Johor memandangkan lokasinya yang strategik. Pada masa kini, terdapat 10 pusat pengumpulan persendirian yang beroperasi di kawasan ini. Selan itu juga, tapak jualan buah-buahan bermusim seliaan Majlis Daerah Yong Peng, di Jalan Ayer Hitam, Labis.

Untuk makluman Yang Berhormat, FAMA pernah mewujudkan sebuah pusat pengumpulan di kawasan ini pada tahun 2010. Namun ia tidak mendapat sambutan kerana para petani lebih cenderung untuk memasarkan hasil mereka kepada peraih-peraih persendirian. Walau bagaimanapun kementerian mengambil maklum cadangan daripada Yang Berhormat Ayer Hitam supaya kerajaan mendirikan sebuah pusat pengumpulan dan pengedaran hasil pertanian di kawasan Yong Peng dan akan memberi pertimbangan sewajarnya terhadap cadangan tersebut.

Usaha berterusan untuk memperkukuh dan memperluaskan pasaran eksport bagi produk pertanian segar Malaysia akan terus dilaksanakan melalui penyertaan dalam pameran perdagangan, perdagangan penggunaan dan juga program promosi dengan kerjasama kedutaan besar Malaysia di luar negara. Bagi tahun 2019, program promosi bagi buah-buahan utama seperti nanas, MD2, durian, tembikai, belimbing telah pun diatur. Antara lokasi luar negara yang terlibat adalah Jepun, China, Hong Kong, Perancis dan Itali.

Bagi *market access*, kita sedang berunding dengan negara-negara lain seperti Korea Selatan, Taiwan, Australia dan sebagainya untuk membuka pasaran yang lebih besar untuk buah-buahan dan juga produk-produk pertanian Malaysia. Sekian, terima kasih.

Tuan Yang di-Pertua: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang hari Khamis, 14 November 2019.

[Kamar Khas ditangguhkan pada pukul 2.47 petang]